



**Komunikadu Imprensa**  
**Munisípiu Vikeke**  
**24 Marsu 2020**

**Xefe Suku Uagua: Formasaun hosi JSMP benefísiu tebes ba líder komunitáriu nomós komunidadade sira iha Suku Uagua, Munisípiu Vikeke**

Iha 19 Marsu 2020, Judisiál System Monitoring Program (JSMP), fasilita treinamentu ba líder komunitáriu nomós membru komunidadade sira iha suku Uagua Postu Administrativu Ossu, Munisípiu Vikeke kona-ba ‘Demokrásia, knaar órgaun soberanu no partisipasaun públiku iha prosesu halo lei no asesu ba justisa formál.

Treinamentu ida ne’e nu’udar mekanizmu ida atu hasa’e koñesimentu no promove dezempeñu serbisu membru konsellu suku nian hodi bele kontribui ho di’ak liu tan ba dezenvolvimentu nasionál iha nível suku, liuliu bainhira trata asuntu sira ne’ebé membru komunidadade sira hasoru,” dehan Casimiro dos Santos, Diretór Interinu JSMP.

Totál partisipante iha treinamentu ne’e hamutuk ema na’in 30 ne’ebé kompostu hosi mane na’in 18 no fetu na’in 12. Partisipante sira ne’e kompostu hosi membru estrutura suku, OPS nomós membru komunidadade, inklui membru komunidadade defisiénsia fetu na’in rua.

Materia treinamentu konstitui sesaun rua, sesaun ida kona-ba demokrásia, knaar órgaun soberania sira-nian no partisipasaun públiku iha prosesu halo lei no sesaun ida kona-ba asesu ba justisa formál iha Timor-Leste ne’ebé inklui kna’ar Juis, Prokuradór, Defensór Públiku, Advogadu Privadu no Polísia.

Iha kada sesaun, iha tempu ba partisipante sira hodi husu, halo komentáriu no hato’o preokupasaun. Iha sesaun kona-ba demokrásia nian, partisipante sira halo pergunta no hato’o preokupasaun sira relasiona ho sistema polítika ho modelu monarkia no repúblika, kestaun tanbasá la halo eleisaun ba administradór postu

sira, tanbasá la kria ministériu ida kona-ba relijiaun no nusa mak membru comunidade sira la halo tuir de'it ona desizaun ne'ebé xefe suku foti na'in ba rai.

Iha sesaun asesu ba justisa nian, kestaun ne'ebé comunidade sira preokupa mak kona-ba atuasaun polísia nian ne'ebé sempre ho violénsia, nomós oinsa dalan ba prosesu kazu abandona labarik sira.

JSMP responde hotu kestaun sira ne'e ho klaru no partisipante sira mós kumpriende ho saida mak JSMP hato'o.

Xefe Suku, Sr. Aguilis Ximenes Guterres iha ninia intervensaun, haktuir katak nia parte agradese tebes ba JSMP tanba bele fó prioridade mós ba suku Uaguia hodi fasilita formasaun liga ho informasaun importante sira ne'e ba comunidade liu-liu ba ami nu'udar membru konsellu suku hodi aumenta ami ninia koñesementu liga ho asuntu demokrásia nomós justisa formál.

Xefe suku hatutan katak ho formasaun ida ne'e bele ajuda ami nu'udar autoridade lokál iha suku ida ne'e atu bele foti desizaun ruma tenke bazeia ba lei ruma, no mós oinsa ami bele kolabora di'ak liu tan iha prosesu ba sistema justisa formál nian.

Iha enseramentu, JSMP mós husu ba partisipante sira atu hatutan tan informasaun hirak ne'ebé sira hetan ba membru comunidade sira ne'ebé la marka prezensa iha treinamentu ne'e. Nune'e, informasaun sira ne'e bele to'o ba ema hotu-hotu iha suku Uaguia.

Atu hetan informasaun kompletu bele kontaktu:

Casimiro dos Santos

Diretór Interinu JSMP

Email: [casimiro@jsmp.tl](mailto:casimiro@jsmp.tl) |

Telefone: 3323883 | 77257466